



Extrait de la revue **SingulierS** du 4^{ème} trimestre 2015

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : Rizêye

Fjez come vos vlez

C'èst l' istwâre d' in cinsî ki vlot vinde su tchfô. Mês la pôve bièsse 'nn-avot dja vèyu du totes lès coleûrs. Il astot fwârt tène dû ç' k' i mètot la marinde. Il avot dès djan.mes come dès bwès d' alumètes... Anfin i flichtot d' partout. Lu cinsî dit a s' fi :

— Dîmègne, dj' îrans ô martchî po sayè du l' vinde.

Come d' èfèt, lu dîmègne arivè, vla nos deûs compères s' la voye do martchî... Ây, pace ki du ç' tins la, on-z-alot a pîd ô martchî. Lu fi monte su lu tchfô èt l' pére lu mine al bride. Ène vîye djint passe èt l'zî dit :

— Bin, c' èst ç' k' on n' è jamès vèyu : in djon.ne gamin assî èt l' pére ki tanfèle padrî !

La dsus, l' fi duschind èt l' pére monte... In pon pus lon, i rascontrèt one djon.ne comére ki rwêtot l' tâblô :

— Â bin c' èst ça, c' èst la djon.nèsse ki dut rotè su l' tins k' lès vîs s' rupwazèt...

Du ç' còp ci, i rtoûrnèt l' tchôr èt i montèt tos lès deûs su l' bayârd :

— Â k' on-z-è bin ! Hin m' fi, di-st-i l' pére.

Ô toûrnant dol voye, èn-ome, ki ruvnot dja do martchî, s' mèt a lès angueulè

— Bin, èst ç' ki v' n' astez nin fôs... A deûs su ç' pôve bièsse la ! V's alez la fè crèvè... Vos n' la vindrez jamès !

Lu cinsî cminçot a marmonè, mès i duschindèt tos lès deûs èt lu tchfô rote tot seû. A kékes çantin.nes du mètes do martchî, ène fème, an lès wêtant passè, l'zî dit :

— Vla co deûs inocins ! La bièsse rote an tourisse èt lès mèches su fjèt crèvè ! Èt l' cinsî lî ruspond :

— Si ça n' vos plêt nin la, nosse dame, v' n'avez k' a clôre lès oûy... Mi, dju fê a ma môde !

Moralité : Fjez come vos vlez, i gn-è todi ink po trovu a rdîre !

Willy LEROY (wallon de Vesqueville)